

lis Gnovis

■ UDIN. Messe par furlan

A Udin, la Messe par furlan e ven cjantade sabide ai 25 di Zenâr, aes 5 e mieze sore sere, li de capele «de Puritât», daprûf dal Domo. Radio Spazio le trasmet sul moment.

■ CODROIPI. L'ort coletif sociâl

Il teren, scuasit 650 metris cuadrâts, al è di proprietât dal Comun di Codroip, e tra pôc su di chest teren a saran inviâts i lavôrs che a coventin par tressâ un ort coletif sociâl par personis cun disabilitât. L'obietif di cheste impuartante iniziative, inmaneade dal Assessôrât comunâl, al è chel di sostignî la integrazion sociâl e di promovî il benstâ psicofisic di chestis personis, cun ativitâts che a favorissin la inclusion e la partecipazion ae societât. Tal stes timp, ufrî une esperience che e puedi fâur cognossî e condividi lis lôr abilitâts specifichis zonstraviers il contat diret cu la nature, e no dome, parcè che in chest ort si podaran davuelzi anje altris ativitâts di socializazion e di colaborazion, cun tantis altris realtâts dal teritori di Codroip. Al sarà il Centri sociorabilitatîf educatîf, che il Comun i à affidât il teren sore nuie, a coordinâ la iniziative, in spiète che, daspò di vè preparât par ben il teren... si puedi rivâ ae meretade racuelte.

■ PORDENONËS. Siacai e lôfs



Cualchi zornade indaûr, te pedemontane di "Là da la aghe", e je stade recuperade la carogne dal maschi di un puar siacal dorât, che al pâr che al sedi stât predât di un grup di lôfs, che a son presints propit in cheste zone. Chest parcè che, secont i esperts, l'animâl al presente dôs buchetis tal cuel, come che al fos stât smuardassât, ma no si esclût che magari si sedi tratât di un câs di canibalism tra i stes siacai. Il lôf, in dal rest, si sa che nol sopuarde masse la presince dai siacai, no par une antipatie, ma par vie che al reste un so competitôr sul teritori e pe sò sorevivenza.

■ UDIN. Un "Friuli DOC" cui stropui di sùr

L'om saç al sa che cun pôc si pues fâ tant. Vie pe manifestazion di "Friuli DOC" dal an passât, a son stâts racuelts fintremai cinc mil stropui di sùr, che la lôr conte si è



sierade di pôc, cuntun sucès che al à fat une vore plasê ai organizadôrs. La racuelte, clamade "Quando stappi, tieni il tappo", e à permetût il lôr ricicli in palanchis di destinâ a finalitâts benefichis, che fin cumò a àn puartât a tirâ dongje la sume di 168.000 euros. La iniziative e larà indenant anje chest an, cu la racuelte dai stropui te sede ENPA di Udin in vie Savorgnana, e il racuelto al sarà destinât ae Associazion de la "Via di Natale". Duncje, no stait a butâ vie i stropui di sùr des butillis cuant che lis vierzês, e tigniju di cont. Un consei, dut câs: no stait a pensâ che par judâ cheste racuelte particulâr, al coventi bevi il plui pussibil...

Miercus 22	S. Vincenz	Domenie 26	III Domenie vie pal an
Joibe 23	S. te Merenziane	Lunis 27	S. te Agnule Merici
Vinars 24	S. Francesc di Sales	Martars 28	S. Tomâs di Aquin
Sabide 25	Conversion di S. Pauli	Il timp	Zornadis cun glaçadis.



Il soreli
Ai 22 al jeve aes 7.40
e al va a mont aes 16.58.



La lune
Ai 29 Lune gnove.

Il proverbi
Cul asê no si cjapin moscjis.
Lis voris dal mê
Netait i machinaris che o doprais
tal ort e tal zardin par che a sedin
pronts tai prossims mê.

Lenghe furlane a scueele: a son viertis lis adesions

*Dai 21 di Zenâr
ai 10 di Fevrâr i
gjenitôrs a podaran
sielzi il furlan pai lôr fis*

Cul an gnûf, come simpri, al rive puntuâl anje il moment di iscrivi i fruts a scueele. Propit in cheste ocasion, che e sedi une iscrizion ae scueele de infanzie, primarie o secondarie di prin grât, tacant dai 21 di Zenâr dal 2025 (e fin ai 10 di Fevrâr), i gjenitôrs a podaran decidi di aderî al insegnament dal furlan pai lôr fis par dute la durade dal cicli scolastic. E je une sielte che l'an passât e à fat adiriture il 78% des fameis, in graciis di une cussience simpri plui grande sui vantaçs linguistics, cognitîfs e culturâi di une educazion plurilengâl. Une vere oportunitât in Friûl, se si pense che une frute o un frut che a studiin il furlan a imparin miôr anje l'inglês e a inressin lis lôr abilitâts logjichis matematchis e creativis. Nol è duncje un câs se la scueele, e la formazion in gjenerâl, a son un dai elements centrâi dal "Plan gjenerâl di politiche linguistiche pe lenghe furlane 2021-2025". Il percors didatic dal furlan al è di almancul 30 oris di studi par an e nol gjave oris a chês altri materiis. La leç, di fat, e previôt che al sedi tal 20% dal curriculum che lis scuelis a stabilissin in maniere autonome. I gjenitôrs a podaran sielzi di zovâsi dal insegnament de lenghe furlane tal moment de iscrizion online sul portâl dal MIUR www.istruzione.it/iscriziononline (tal câs de scueele primarie e di chês secondarie di prin grât) o suntun



Particolâr dal logo che al promôf l'insegnament dal furlan te scueele

*E je une sielte
che l'an passât
e à fat adiriture
il 78%
des fameis,
in graciis
di una cussience
simpri plui
grande
sui vantaçs
linguistics,
cognitîfs
e culturâi
di una educazion
plurilengâl*

modul di cjarte (tal câs de scueele de infanzie). Lis segretariis di ogni istitût, dut câs, a son simpri a disposizion par cualsisedi sclariment. Cun di plui, par supuartâ la ativitât didatiche in classe al è "Anin!", il manûal che al compagne i arlêfs de scueele primarie a scuvierzi la lenghe e la culture furlane. Un invistiment pal avignî de lenghe promovût de ARLeF-Agenzie regionâl pe lenghe furlane e de Region Autonome Friûl-Vignesie Julie, donât a ducj i students che a sielzin di imparâ il furlan a scueele. Pes classis 1e e 2e, al è stât realizât un volum par svicinâsi in maniere graduâl ae lenghe. Chel pe 3e, 4e e 5e, invezit, al à aprofondiments su la storie e su la gjeografie dal Friûl, su la lenghe e su la letature. Dut intune dimension plurilengâl, cu la presince dal inglês e di chês altris lenghis che si fevelin tal teritori regionâl.

A cui che si domande ancjemò parcè che l'insegnament dal furlan a scueele al sedi une oportunitât, si pues rispuindii che nus al dis la sience: cressi cun plui lenghis, za di cuant che si è une vore piçui, al permet di imparant cun plui facilitât altris, tant che l'inglês par esempi, ma no dome. No son dubis che si trati di una vere risorse cognitive di tignî in grande considerazion. Lis evidencis científichis a mostrin anje che i fruts bilengâi a disvilupin una capacitât di aprediment plui grande, una velocitât di comprehension plui svelte e abilitâts logjichis matematchis e creativis plui altis. Ma no dome: si adatin cun plui facilitât ai cambiamenti, di là di vè un propension plui grande tal vierzisi bande chei altris. Infîn, e je anje la salut dal cerviel: cul doprâ plui lenghis si lu manten zovin e agil, intardant i pericui di demence e Alzheimer.

Tradizions furlanis dal mê

par cure di Mario Martinis

SANTE GNESE

Secont la tradizion, Gnese e jere une frutate di 12 agns che fo martirizade a Rome tor dal 304 d.C. par non vè cedût a lis vois di un patrizi. La liende e vûl che fos sgosade come un agnel, simbul di purece, tant che te iconografie catoliche e ven rapresentade vicin a un agnelut, che al à il non latin ("agnus") che par assonance al ricuarde propit il non de sante. La sò fieste e ven celebrade il 21 di Zenâr. In Friûl Sante Gnese e je titulâr des glesiis di Ioannis-Visc, di Porcie e Gruâr passe che di diviersis capelis e tancj altârs in lûcs di cult. Considerade protetore des zovinis, in cetantis glesiis furlanis te sò festivitât a vignivin celebradis messis a pro de zoventût e in particulâr des fantacinis e des frutis cu la lôr seguitive benedizion. In Friûl la fieste de sante vergjine romane e segnave il moment adat



par verificâ la consistence dai prodots agraris conservâts pal sostentament de famee e des bestiis de stale par podeê dosâju par dut l'Unvier. La particulâr usanze (che secont i lûcs e jere rinovade ae Cereole o a Sant Valentin) e vignive fate tes cantinis, tes ariis e sui cjascj des cjasis dai contadins par vè la certece di fâ fûr la brute stagion cu la mangiative. Un proverbi al conferme cheste impuartante funzion agrarie: Sant'Agnes oris dis: interie la bafe, mieze la mede e mieç il pan de famee. Une grande sagre in non de sante protetore dal país e ven fate a Joannis di Daël la domenie seguitive ai 21 di Zenâr, che e je considerade la prime fieste de anade inte Basse furlanie, cun tancj golosets come i pistuns e l'alestiment in gale dai portons.